

SEGUNDA CARTA DEL APOSTOL SAN PABLO A LOS TESALONICENSES

1 ¹Wejrnacqui Pablužtan, Silvanužtan, Timoteužtan tii cartal cjijržcuča ančhuc Tesalónica wajtchiz žoñinacžquin. Nii wajtquiz icliz žoñinacčhucča. Nižaza učhumča Yooz Ejpžquinami Jesucristo Jiliržquinami kuzzizqui. ²Jalla nižtiquiztan Yooz Ejpžtan nižaza Jesucristo Jiliržtan ančhucaquiz zumaj yanapt'ila. Nižaza walikaj kamkatla. Nižaza zuma contento kuzziz cjiskatla.

CRIICHI ŽOÑINACAQUI SUFRIŠTANČHA

³Jilanaca, cullaquinaca, wejrnacqui ančhucaž zuma kamtiquiztan tirapan Yoozquin sparaquič cjiwčha. Jalla nužupan chiiz waquizuča. Ančhucqui juc'anti juc'anti Yoozquin kuzziz cjissa, nižaza juc'anti juc'anti porapat zuma munaziñi kuzziz cjissa. ⁴Nižaza ančhucaž zuma kamtiquiztan wejrnacqui ančhuca honora paruča Yooz iclizanacquinami. Ančhucqui walja sufricanami, nižaza žoñinacaž chjaawjkatta cjenami awantichinčhucča. Ančhucča pasinziz kuztan Yoozquin tira tjurt'inčhucqui. Nižaza Yoozquinčha tjapa kuztan tira žejlžqui. ⁵Jaziqui ančhucqui Yooz partirquiz cjen

sufriskattača. Jalla nižta sufritaqui kjanapacha tjeeža, Yooz Ejpqui ančhucjapa tantiichiča, ančhucqui Yooz arajpach wajtquin luzkatz waquiziča, jalla nii.

⁶Yoozqui nii ančhucaquiz chjaawjkatñi žoñinaca legali casticaquičha. Anziqui ninacaqui ančhucaquiz sufriskatča. Ultimquiziqui Yoozqui ninacžquiz sufriskataquičha. ⁷Nižaza ančhucaž sufritiquiztan Yoozqui ančhucaquiz jeejskataquičha Jesucristo Jilirž tjonz tjuñquiziqui. Nižaza wejtnacaquiz jeejskataquičha. Tsewc arajpachquiztan Jesucristuqui niž walja azziz anjilanacžtan jecžcaquičha. ⁸Tsjii ujžtakaz kjakaquičha. Jalla nii uj irata ana Yooz pajñinacž quintra cjequičha. Ninacaqui castictaž cjequičha. Nižaza jakziltat učhum Jesucristo Jilirž zuma liwriñi taku ana cazzit cječhaja, jalla ninacami castictaž cjequičha. ⁹Jalla tjapa nii casticta žoñinacami wiñayaž sufraquičha. Yooz yujcquiztanaqui wiñayaž chjatkattaž cjequičha. Arajpachquin Yoozqui niž zuma azi tjeeznaquičha. Pero nii casticta žoñinacaqui Yooz zumanaca anaž cheraquičha. ¹⁰Jalla nii Jesucristo Jilirž tjonz tjuñquiziqui, Yooz

partir žoñinacami niižquin honora waytazaquiċha. Anċhucqui wejrnacaž paljayta Yooz taku catokchinċhucċha. Nižaza Jesucristuž tjonz cheržcu, Yooz taku catokchinacaqui ispantichi cjequiċha. Pero contintuž cjequiċha.

¹¹ Wejrnacqui tirapan Yoozquin mayizuċha anċhucaltajapa, anċhuc ultimu liwriita cjeajajo. Yoozqui anċhucacqui kjawziċha nižta ultimu liwriita cjeajajo. Jaziqui Yoozqui anċhucacqui liwriita cjis waquizkataquiċha. Jalla nuž mayizuċha. Yoozqui niž aztan anċhucacqui zuma pinsitanacami cumplista cjiskataquiċha. Jalla nuž zakaz mayizuċha. Nižaza Yoozquin kuzziz cjen, anċhucqui zuma obranaca paaċha. Yoozqui niž aztan tjapa anċhucacqui zuma obranaca cumplista cjiskataquiċha. Jalla nuž zakaz mayizuċha. ¹² Jalla nekztanaqui anċhucacqui zuma kamchiž cjen Jesucristo Jiliriqui honorchiz cjequiċha. Nižaza Jesucristuž cjen anċhucqui honorchiz zakaz cjequiċha. Tjapa nižtanaca wataquiċha uċhum Yooz Ejpžtan Jesucristo Jiliržtan uċhumnacacqui okžniž cjen, nižaza yanapchiž cjen.

ANA WALI PAAÑI ŽOÑŽ PUNTU

2 ¹ Jilanaca, cullaquinaca, uċhum Jesucristo Jilirž tjonanaqui, uċhumqui juntjapznaquiċha, nižtan zalzjapa. Jalla nii puntuquiztan anċhucacqui intintiskatz pecuċha. ² Yekjap žoñinacaqui anċhucacqui incallzkatz pecċha, “Jesucristuqui tjonchikalċha” cjan. Jalla nižta chiita taku nonžcu, anaž anċhucqui tsuca. Nii takunaca ana juyzu paa. Nižaza anaž kuz turwayskata. Ninacaqui cjiċha, “Yoozqui Pablužquiz nii taku tjaachiquiċha. Nekztan Pablupacha

wejtquiz quint'ichiċha, ‘Jesucristuqui tjonchikalċha’, jalla nii. Nižaza Pabluqui nuž tsjii cartiquiz cjiŕrchiċha”. Jalla nuž cjiċha nii toscara chiini žoñinacaqui. Jalla nižta chiita taku nonžcu, ana criyaquiċha. ³ Ana jaknužumi nii Jesucristuž tjonz puntuquiztanami incallta cjee. Ima Jesucristuž tjonan, walja žoñinacaqui juc'ant Yooz quintra cjistanċha. Nižaza tsjii juc'ant ana wal žoñiqui jecžcaquiċha. Wiruñacqui nii žoñiqui wiñaya casticta cjequiċha. ⁴ Jalla niiqui ċhjul yooznacacquižtanami juc'ant tucquin cjis pecaquiċha. Nižaza ultim werar Yooz quintrami, nižaza žoñiž paata yooz quintrami aptasaquiċha. Nižaza tjapa tii muntuquiz amtitanaca quintra aptasaquiċha. Nižaza nii ana wal žoñiqui, “Wejrtċha chekan Yooztqui” cjequiċha. Werar Yooz timpluquinpankaz julznaquiċha Yooztakaz.

⁵ Anċhucatan žejlcan, jalla nižtapan paljaychinċha. ¿Ana cjuñž anċhucjo? ⁶ Tii zakaz nonžna anċhucqui. Nii juc'ant ana wali paañiqui atajtaċha. Wiruñacqui Yooziž pinsita timpu niiqui parizaquiċha. ⁷ Anziqiu ana wali paañinaca žejlċha. Nižaza ana walinaca paaċha. Nii ana walinaca paañinaca atajtaċha, ċhjul ana walimi ana paajo. Wiruñacqui nii atajñiqui ana iya atajaquiċha. Nekztan ċhjul ana walimi paata cjesaċha. ⁸ Jalla nii ana atajanaqui nekztan nii juc'ant ana wali paañiqui jecžcaquiċha. Nekztanaqui Jesucristo Jiliriqui tjonžcu, persun tawkžtan nii ana wali paañi conaquiċha. Nižaza walja aztan tjonžcu nii ana wali paañi liw akznaquiċha Jesucristo Jiliriqui. ⁹ Satanás cjiata diabluqui nii juc'ant ana wali paañi žoñi jecskataquiċha. Nižaza Satanás aztan ispantichuc milajrunacami

siñalanacami paaquičha žoñinacžquiz incallzjapa. ¹⁰Niž ana wal kuzcama kamcan tjapaman milajrunaca paaquičha, nižaza tjapaman takunaca parlaquičha, incallzjapa. Jalla nuž ojklaycan incallaquičha infiernuquin ojknī žoñinacžquiz. Jalla nii žoñinacaqui Yooz werar taku ana catokz pecchiča, liwriita cjisjapaqui. ¹¹Jalla nižtiquiztan Yoozqui ninaca jakjurpaychiča, incallta cjejajo werar Yooz taku ana criiñiž cjen. Nižaza nii ana liwriita žoñinacaqui toscar takupan criyaquičha. ¹²Ninacača ana wali paatanacapankaz justasñiqui, jalla nižtiquiztan tjapa nii Yooz taku ana criichi žoñinacaqui casticaž cjequičha.

ILLZTA ŽOÑINACAQUI LIWRIITA CJEQUIČHA

¹³Yooz k'ayi jilanaca, cullaquinaca, wejrnacqui ančhucaž cjen tirapan Yoozquin sparaquiž cjistanča. Tuqui timpuquiztanpacha Yoozqui ančhuc illzipanča liwriita cjisjapa. Nižaza ultimupan liwriitaž cjequičha Espřitu Santuž cjen, nižaza werar taku criichiž cjen. Nii Espřitu Santuqui ančhucaquiz ancha zuma yanapča, ančhuca kuz ultimu zumapankaz cjisjapa. ¹⁴Jalla nijapa Yoozqui ančhuc kjawziča. Wejrnacaž zuma liwriiñi Yooz taku paljaytaž cjen, Yoozqui ančhuc kjawziča, Jesucristo Jiliržtan ančhucqui zuma honorchiz cjisjapa. ¹⁵Jaziqui jilanaca, cullaquinaca, tirapan tjurt'iñi kuzziz cjee. Wejrnacqui ančhucaquiz tjaajinchinča, chiita takunacžtanami nižaza cjijrta takunacžtanami. Jalla nii tjaajinta takunaca anapan tjatzna. Nii tjaajinta jaru panž kama. ¹⁶Učhum Yooz Ejpqui učhumnaca okziča, nižaza niiča wiñayjapa cuntintu cjiskatñi. Nižaza

učhumnaca okžcan, ančhucaquiz tjewskatča, arajpachquin nižtanpan zuma kamz, jalla nii. ¹⁷Yooz Ejpžtan učhum Jesucristo Jiliržtan, jalla ninacapacha ančhuca kuznaca p'ekinchayaquičha. Nižaza ninacaqui ančhucaquiz juc'ant tjurt'iñi kuzziz cjiskataquičha tjapaman walinaca paažo, nižaza tjapaman wali takunaca parlajo. Jalla nuž ančhucaltajapa mayizuča.

3 ¹Jilanaca, cullaquinaca, tiicamakal chiizinača. Wejtnacalta Yoozquin mayiza, Yooz taku tjapa kjtñi paljayajo, nižaza mayiza nii paljayta Yooz taku tjapa kuztan catokta cjejajo. Jalla nižta ančhucqui Yooz taku catokchinčhucča. ²Nižaza Yoozquin mayiza, ana wal kuzziz žoñinacžquiztan wejrnac tsijsinajo. Yekjap žoñinacaqui anača Yoozquin kuzziz. ³Jesucristo Jiliriča cumpliñiqui. Jalla nižtiquiztan niiqui ančhuca tjurt'iñi kuzziz chejlinaquičha, nižaza anawalinacquiztanž zumapanž cwitaquičha. ⁴Ančhucaž Yooz Jiliržquin kuzziz cjen, wejrnacqui tantiichinča, ančhucqui wejtnacaž mantitacama kamiñchucča, nižaza niicama tira kamcan želaquičha, jalla nii. Jalla nužupan cjequičha. ⁵Jesucristo Jiliriqi ančhuca kuz irpila, Yooz irata jilanacžtan zuma munazajo, nižaza Jesucristuž irata pasinziz kuzziz cjejajo. Jalla nuž mayizuča.

ANA JAYRAZCU LANGZ WAQUIZIČHA

⁶Jilanaca, cullaquinaca, Jesucristo Jilirž tjuuquiz ančhucaquiz mantuča. Jayrazñi jilanacžquiztan zarakaquičha. Jalla ninacaqui wejrnacaž tjaajintacama ana kamča. ⁷Jaknužt wejrnacqui kamučhaja, jalla niicama ančhucalaqui kamsa. Wejtnacaž

kamaña yatekaza. Wejrnacqui ančhucatan žejlcan walja langzinča. ⁸Nižaza kjayžcu t'antami čherimi lujlchinča. Majiñami weenami walja langzniñča ochañcama, ančhucalta ana ch'ama cjeayo. ⁹Ančhucaltan žejlcanaqui wejrnacqui ančhucacauiztan čheri mayiñ cjichuca cjitasača. Ultimquiz anal maychinča. Antiz langzinča, tsjii kamaña tjeezjapa. Jalla niwjctanaqui tsjii zuma kamaña tjeez pecchinča, ančhucqui nii kamañquiz jaru kamzjapa. Jakziltat lujlz pecčhaja, langz waquiziča. ¹⁰Ančhucatan žejlcan, chiižinčinča. “Jakziltat ana langz pecčhaja, jalla niiqui anaž lujlz waquiziča yekž čherquiztan”. ¹¹Pero tsjii quinto nonzinča. Yekjap ančhucacauiztan ana langžcu kamñiquiča. Ana langžcu, ana persun luraña paažcu, jayrazcan yekja žoñž asuntunacquiz mitisñiquiča. ¹²Jalla nižta žejlñi žoñinacžquiz mantuča ana nižta cjisjapa. Učhum Jesucristo Jilirž tjuuquiz ninacžquiz chiižinuča,

zuma kuzziz nižaza ana mitisñi kuzziz langznaquiča persun wira mantinzjapa, jalla nii.

¹³Jilanaca, cullaquinaca, zuma paazjapa anaž očhlla. ¹⁴Jakziltat tii weriž cartiquiz cjijrta taku anapanž catokz pecčhaja, jalla nii zumpacha cheraquiča, jecčhalaj nii. Nižta žoñžquinaqui anapanča tjonzqui, nižaza anapanča niižtan ojklayzqui, nii žoñipacha azajo niiž anawal kamañquiztan. ¹⁵Anaza niižjapa quintracjee, antiz nii criichi jilžquiz zuma tawkžtan chiižina.

¹⁶Jesucristo Jiliriča cuntintu kuzziz cjiskatñiqui. Jalla nii zakaz ančhuca kuz walikaj cjiskatla zapurumi nižaza čhjulu cjenami. Nižaza Jesucristo Jiliriqui ančhucatan chicapachaj kamla. ¹⁷Wejrqui Pablutča. Anziqui tii ančhucacuin tsaanz letanaca persun kjaržtan cjijržcuča. Jalla nužupan zapa cartiquiz wejt firmapan firmuča. ¹⁸Učhum Jesucristo Jiliriqui tjapa ančhucacauiz zumaj yanapla. Nužukazza. Amén.